

„Trenutni izazovi s kojima se suočava Jugoistočna Evropa i borba protiv štetnog uticaja Rusije u regionu“

*Izlaganje predsjedika Skupštine Crne Gore Ivana Brajovića,
Vašington, 5. 02. 2019.*

Zahvaljujem senatoru Inhofu i Fatmiru na prilici da se kratko obratim. Pozdravljam sve prisutne. Vjerujem da nas sve ohrabruje rješenje dugogodišnjeg spora između Makedonije i Grčke, čime je odblokiran put Makedonije u NATO i u EU. Lično sam čestitao na hrabrosti zvaničnicima Makedonije tokom nedavne posjete njihovoj zemlji. Nadam se da ćemo se isto tako radovati i konačnom ishodu dijaloga Srbije i Kosova. To je kompleksan problem koji pored pitanja funkcionalnosti Bosne i Hercegovine najviše opterećuje Region. Nikada nije dovoljno ponavljanja da bez stabilnosti nema ni prijeko potrebnog ekonomskog razvoja Jugoistočne Evrope.

Crna Gora je posvećena regionalnoj saradnji i posebno je ponosna na svoju dobrosusjedsku politiku. Nemamo otvorenih pitanja koja značajnije mogu opteretiti te odnose. Uprkos brojnim izazovima postali smo članica NATO. To nam je bilo posebno važno kako bismo učvrstili svoj suverenitet i teritorijalni integritet, a benefiti članstva u ekonomskom smislu već su vidljivi.

Imajući u vidu ostvareni napredak s pravom očekujemo da budemo prva naredna članica EU. Naš je interes da sve zemlje Jugoistočne Evrope budu dio NATO i EU. Spremni smo svima koji to žele da prenesmo svoja iskustva i znanje. Evropa ne može biti potpuna i dovoljno jaka bez integracije Zapadnog Balkana.

Poznat je odnos Rusije i njene reakcije prema našem članstvu u NATO. Svi pamtimo narativ zvaničnih organa i medija u Rusiji koji je pratio naše pristupanje NATO.

Čast nam je da budemo među 29 saveznika koji dijele iste vrijednosti i čvrsto vjerujemo da svaka zemlja, bez obzira na svoju veličinu, ima važnu ulogu u sigurnosnoj arhitekturi Sjevernoatlantskog područja.